

fé, qu'il se vouloit venir cabaner auprès de nous, comme il a fait depuis) retournant de la chasse aux ours, s'en vint souper & coucher chez nous. Ayant bien mangé, il commence en riant à frapper doucement son ventre tout nud, disant, *taponé nikisspoun*, en verité ie suis saoul. voilà comme ils remercient leurs hostes de la bonne chere qu'on leur a faict: quand ils disent *nikisspoun*; ie suis saoul, c'est à dire qu'on les a bien traittez. Il portoit avec soy vn fort grand bouclier fort lóg & fort large: il me couuroit tout le corps aisemét, & m'alloit depuis les piés iusques à la poictrine: ils le releuét & s'en couurent entieremét, il estoit fait d'vne seule piece de bois de cedre fort leger: ie ne scay comme ils peuuent doler vne si grande & si large planche avec leurs couteaux: il estoit vn petit plié ou courbé pour mieux couvrir le corps, & afin que
les